

**“Abu Rayhon Beruniy nomidagi Urganch davlat universitetida talabalarning
korrupsiyaga qarshi loyihalari, startap va innovatsion tashabbuslarini
qo‘llab-quvvatlash tartibi to‘g‘risida
NIZOM**

1-bob. Umumiy qoidalar

1. Ushbu Nizom Urganch davlat universitetida talabalarning korrupsiyaga qarshi loyihalari, startap va innovatsion tashabbuslarini (keyingi o‘rinlarda — loyihalar) qo‘llab-quvvatlash tartibini belgilaydi.

2. Mazkur nizomda quyidagi tushunchalar qo‘llaniladi:

talabgor — loyihani ishlab chiqqan Urganch davlat universitetida ta‘lim olayotgan talabalar;

Tanlov komissiyasi — tanlov doirasida kelib tushadigan loyihalarni ko‘rib chiqish, tanlovlarni o‘tkazish, g‘oliblar to‘g‘risida xulosa qilish va ushbu jarayonni muvofiqlashtirish uchun oliy ta‘lim muassasalarida tashkil etiladigan komissiya;

Ishchi guruh — Urganch davlat universitetida tashkil etiladigan moliyalashtirilgan loyihalar ustidan monitoring ishlarini amalga oshiruvchi va muvofiqlashtiruvchi guruh;

texnik ekspertiza — taqdim etilgan loyihalarning ushbu Nizom talablarga muvofiqligi, shuningdek, loyiha hujjatlariga oid ma‘lumotlarni tahlil qilish jarayonlari;

loyiha — Urganch davlat universitetida talabalarning korrupsiyaga qarshi kurashish va oldini olish maqsadida ishlab chiqilgan, shaffoflikni ta‘minlashga qaratilgan startap va innovatsion tashabbuslari;

tanlov — Urganch davlat universiteti tomonidan talabalarning loyihalarini moliyalashtirish va amalga oshirishga ko‘maklashish uchun bir yilda bir marotaba e‘lon qilinadigan tanlov.

2-bob. Loyihalarni shakllantirishga qo‘yiladigan umumiy talablar

3. Tanlovga talabalarning korrupsiyaga qarshi kurashish va oldini olish bo‘yicha innovatsion tashabbuslari hamda korrupsiyaviy muammolar yechimiga qaratilgan loyihalar qabul qilinadi.

4. Urganch davlat universitetida tanlov boshlanishidan bir oy oldin o‘z rasmiy veb-saytiga arizalarni shakllantirish, ro‘yxatdan o‘tkazish va topshirish tartibi, muddati va talablari ko‘rsatilgan e‘lonni joylashtiradi.

6. Bir kalendar yili davomida e'lon qilingan tanlovda g'olib bo'lgan talabgorlar shu davr ichida navbatdagi e'lon qilingan tanlovlarda ishtirok etishiga yo'l qo'yilmaydi.

Bunda talabgorlar dastlabki tanlovda bir nechta loyihalari bilan ishtirok etishlari mumkin.

7. Tanlov doirasida maket va (yoki) prototip yaratishning hamda loyihani amalga oshirishning eng ko'p muddati bir yilgacha bo'lishi mumkin.

Bunda loyihani amalga oshirishga qo'shimcha muddat talab etilsa, Ishchi organning asosli xulosasi asosida oliy ta'lim muassasasi va talabgor o'rtasida qo'shimcha shartnoma imzolanishi mumkin.

3-bob. Tanlov komissiya faoliyatini tashkil etish tartibi

8. Tanlov doirasida kelib tushadigan loyihalarni ko'rib chiqish bo'yicha Tanlov komissiyasi tarkibi oliy ta'lim muassasasi rahbari tomonidan tasdiqlanadi.

9. Tanlov komissiyasi o'z yo'nalishida kamida 3 yil mehnat stajiga ega, oliy ma'lumotli, oliy ta'lim muassasasi xodimi bo'lgan kamida 7 nafar a'zolaridan iborat tarkibda tuziladi. Tanlov komissiyasiga raislik qilish vazifasi oliy ta'lim muassasasi Ilmiy ishlar va innovatsiyalar bo'yicha prorektori yoki Korruptsiyaga qarshi kurashish "Komplayens-nazorat" tizimini boshqarish bo'limi boshlig'iga yuklanadi.

Bunda, tanlov komissiyasi raisi zarur hollarda tor ixtisoslashuvdagi mutaxassislarni (shu jumladan, huquqni muhofaza qilish organlarini) qo'shimcha ravishda loyihalarni ko'rib chiqish jarayoniga jalb qilishi mumkin.

10. Tanlov komissiyasi majlisi, unda komissiya a'zolarining kamida uchdan ikki qismi ishtirok etgan taqdirda, vakolatli hisoblanadi.

11. Tanlov komissiyasi tomonidan qabul qilingan qarorlar bayonnomalar bilan rasmiylashtiriladi.

12. Tanlov komissiyasi majlislari yopiq muhokama shaklida tashkil etiladi.

4-bob. Loyihalarni ko'rib chiqish va tanlab olish tartibi

13. Loyihani ko'rib chiqish Tanlov e'lon qilingandan so'ng, talabalarning aniq amalga oshirish mexanizmlari, muddati va dastlabki natijalari ko'rsatilgan Loyihalari asosida amalga oshiriladi.

14. Tanlovga kelib tushgan loyihalar Tanlov komissiyasi tomonidan Loyihalarga qo'yilgan talablar asosida to'liq taqdim etilganligi va rasmiylashtirilganligi ko'rib chiqiladi.

Bunda, Tanlov komissiyasi zarur holatlarda qo'shimcha ma'lumotlar va taqdimotlar talab etishi hamda qo'shimcha ravishda Loyihalarni o'rganish uchun tegishli mutaxassislarni jalb qilishi mumkin.

15. Loyihada kamchilik mavjud bo'lgan taqdirda, talabgorga takomillashtirish uchun qaytariladi. Talabgor loyihani bir hafta muddat ichida

takomillashtirilgan holda qayta taqdim etadi. Bir haftadan kech taqdim etilgan loyihalar qabul qilinmaydi.

16. Tanlov komissiyasi tomonidan tanlovda ishtirok etuvchi talabgorlar ro'yxati shakllantiriladi. Talabgorlar loyihalarni Tanlov komissiyasi oldida taqdimot (prezentatsiya) ko'rinishida himoyasini o'tkazadilar.

17. Taqdimot himoyasida talabgorlar loyihani qisqa, lo'nda va asoslangan holda ochib berishi hamda puxta tayyorgarlik ko'rgan holda ishtirok etishlari talab etiladi.

Bunda, Tanlov komissiyasi taqdimot natijalariga asosan yakuniy xulosa tayyorlashda quyidagi baholash mezonlariga amal qiladi:

loyihaning samaradorligi (20 ballgacha) — loyihaning korrupsiyaga qarshi kurashishdagi amaliy samaradorligi, real natijalar va uning uzoq muddatli ta'siri. Loyihaning maqsadga muvofiqligi va uning korrupsiya oldini olishdagi o'rni;

innovatsion yondashuv (20 ballgacha) — loyihada korrupsiyaga qarshi yangi va innovatsion usullar, texnologiyalar yoki yondashuvlarning qo'llanilishi. Masalan, elektron tizimlar, monitoring va audit mexanizmlari orqali korrupsiya darajasini kamaytirish;

ijtimoiy ta'sir va keng ko'lamlilik (20 ballgacha) — loyihaning ijtimoiy ta'siri, keng jamoatchilikni qamrab olishi va turli ijtimoiy qatlamlarga ta'sir qilishi va uning ko'lamlilik kattaligi;

ishonchlilik va shaffoflik (20 ballgacha) — loyihaning shaffofligi, jarayonlarning ochiqqligi, ishtirokchilar va jamoatchilik uchun hisobotlar va monitoring mexanizmlarining mavjudligi. Loyihaning ishonchli va to'liq ma'lumotlar asosida amalga oshirilishi;

resurslar va xususiy sektor bilan hamkorlik (20 ballgacha) — loyihaning zarur resurslar (moliyaviy, inson kapitali, texnologik) bilan ta'minlanishi, shuningdek, xususiy sektor va boshqa tashkilotlar bilan samarali hamkorlik qilinishi.

Tanlovda talabgorlar baholanganidan so'ng, kamida 70 ball to'plagan barcha loyihalar Oliy ta'lim, fan va innovatsiyalar vazirligiga ko'rib chiqish uchun yuboriladi.

Oliy ta'lim, fan va innovatsiyalar vazirligida har tomonlama bir-birini takrorlagan – ham mazmunan, ham metodik jihatdan bir xil bo'lgan loyihalar mavjud yoki mavjud emasligi ko'rib chiqiladi (mazmunan va metodik jihatdan bir xil bo'lgan, har tomonlama bir-birini takrorlagan loyihalar bekor qilinadi).

Oliy ta'lim, fan va innovatsiyalar vazirligiga ko'rib chiqish uchun loyiha kelib tushgandan boshlab 10 kun muddat ichida oliy ta'lim muassasalariga qaytariladi.

18. Oliy ta'lim, fan va innovatsiyalar vazirligidan qaytgan loyihalar bo'yicha talabgorlarni baholash hamda g'olib deb topish Tanlov komissiyasining bayonnomasi bilan rasmiylashtiriladi. Bunda, kamida 70 ball to'plagan barcha loyihalar Tanlov komissiyasi qarori bilan g'olib deb topilishi mumkin.

Tanlov komissiyasi qarori qat'iy hamda qayta ko'rib chiqilmaydi.

19. G'olib deb topilgan talabgorlar to'g'risidagi ma'lumotlar oliy ta'lim muassasasining rasmiy veb-saytida joylashtiriladi.

20. Bir talabgor loyihasini amalga oshirish uchun talab qilinadigan mablag'larning umumiy qiymati bazaviy hisoblash miqdorining 400 baravaridan oshmasligi lozim.

5-bob. Loyihalarni moliyalashtirish tartibi

21. Tanlovda g'olib deb topilgan talabalarning loyihalarini moliyalashtirish oliy ta'lim muassasasi budjetdan tashqari mablag'lari hisobidan o'zi tashkil etgan tanlovlar natijalariga ko'ra amalga oshiriladi.

22. Loyihalarni moliyalashtirish oliy ta'lim muassasasi rahbarining tegishli buyrug'iga muvofiq amalga oshiriladi.

23. Loyihalarni amalga oshirish uchun g'olib talaba hamda oliy ta'lim muassasasi o'rtasida ikki tomonlama shartnoma tuziladi va moliyalashtirish shartnoma shartlariga muvofiq bosqichma-bosqich amalga oshiriladi.

24. Ajratilgan mablag'lar loyiha doirasida xarid qilinadigan asbob-uskunalar, xizmatlar, xomashyolar hamda oylik maosh, shuningdek boshqa zarur materiallarni xarid qilishga yo'naltirilishi lozim.

Talabgor loyiha doirasida zarur bo'lgan asbob-uskunalar, xomashyolar hamda boshqa materiallar, shuningdek xizmatlarni xarid qilish uchun oliy ta'lim muassasasiga talabnoma asosida murojaat qiladi va shu asosda ta'lim muassasasi tomonidan xarid qilish choralari ko'riladi.

Loyiha doirasida xarid qilingan asbob-uskunalar, xomashyolar hamda boshqa zarur materiallar oliy ta'lim muassasasi balansida qoldiriladi.

25. Talabgor va uning jamoasi uchun oylik-maosh loyiha uchun ajratilgan umumiy mablag'ning 50 foizidan ko'p bo'lmagan miqdorda belgilanadi.

Talabgor va uning jamoasiga oylik-maosh berish loyiha bajarish muddatlarida har oy plastik kartasiga o'tkazib berish orqali amalga oshiriladi.

26. Agar tanlovga kelib tushgan loyiha qiymati mazkur nizomda belgilangan miqdordan oshsa, oliy ta'lim muassasasi loyihani belgilangan tartibda Innovatsion rivojlanish agentligi tomonidan e'lon qilinadigan startap loyihalar tanlovlariga taqdim etishi mumkin.

27. Talabgor loyihani takomillashtirish maqsadida homiylik va investitsiya mablag'larini jalb qilish, yoki mahalliy va xalqaro grantlar tanlovlarida ishtirok etishi mumkin.

6-bob. Loyihalarni amalga oshirilishini monitoring qilish tartibi

28. Tanlovda g'olib bo'lgan loyihalarning amalga oshirilishini monitoring qilish Talabgor bilan tuzilgan shartnoma shartlariga muvofiq amalga oshiriladi.

29. Monitoring loyiha tasdiqlangan rejaga muvofiq bajarilishi, moliyaviy mablag'larning maqsadga muvofiq sarflanishi, belgilangan muddatlarda hisobotlar taqdim etilishi va olingan natijalarning samaradorligini baholashni o'z ichiga oladi.

30. Loyihalarning natijalari monitoringi oliy ta'lim muassasasida tashkil etilgan Ishchi guruh tomonidan amalga oshiriladi.

31. Loyihalarning monitoring natijalari bo'yicha jamlanma hisobotni belgilangan tartibda qabul qilish, shuningdek, ularni bajarish bo'yicha axborot va boshqa tahliliy materiallar tayyorlash Ishchi guruh tomonidan amalga oshiriladi va keyingi bosqichni moliyalashtirish bo'yicha xulosa qiladi.

32. Loyihalar bo'yicha belgilangan ishlarning alohida bosqichlarining rejalashtirilgan vazifalarni o'z muddatida bajarmaslik, shuningdek, hisobotlarni topshirish muddatlarini va moliyaviy intizomni buzish, Ishchi guruh tashabbusi bilan moliyalashtirish to'xtatilishiga va shartnoma bekor qilinishiga asos bo'lishi mumkin.

7-bob. Yakunlovchi qoidalar

33. G'olib talabgor bir loyihada loyiha rahbari sifatida, boshqa loyihalarda loyiha ishtirokchisi sifatida ishtirok etishi mumkin.

34. G'olib talabgorlar hisobotlarni belgilangan muddatlarda topshirilishi, shuningdek, moliyaviy mablag'larning samarali va maqsadli sarf qilinishi uchun shaxsan javob beradilar.

35. Ushbu nizom talablarini buzganlikda aybdor shaxslar qonunchilik hujjatlarida belgilangan tartibda javob beradilar.

Urganch davlat universitetida
talabalarning korrupsiyaga qarshi
loyihalari, startap
va innovatsion tashabbuslarini qo'llab-quvvatlash
tartibi to'g'risidagi
NIZOMga ilova

**Loyihalarni tasdiqlash va moliyalashtirish
SXEMASI**

Bosqichlar	Subyektlar	Amalga oshiriladigan tadbir	Bajarilish muddati
1-bosqich	Urganch davlat universiteti	Talabalarning korrupsiyaga qarshi loyihalari, startap va innovatsion tashabbuslarini qo'llab-quvvatlash bo'yicha tanlov e'lon qiladi	1 oy
1-bosqich	Talabgorlar	Tanlov talablariga ko'ra o'z loyihalarini tanlovga taqdim etadi	1 oy
3-bosqich	Tanlov komissiyasi	Loyihalarni texnik ekspertizadan o'tkazadi, kamchiliklar mavjud bo'lgan taqdirda qayta ishlashga yuboradi	10 ish kuni
4-bosqich	Talabgor	Qayta ishlashga yuborilgan loyihalarni kamchiliklarini bartaraf etgan holda qayta taqdim etadi	10 ish kuni
5-bosqich	Tanlov komissiyasi	Loyihalarni ko'rib chiqadi va moliyalashtirish yoki rad etish bo'yicha qaror qabul qiladi	20 ish kuni
6-bosqich	Urganch davlat universiteti	Moliyalashtirishga tavsiya etilgan loyihalar bilan shartnoma tuzadi	1 oy
7-bosqich	Urganch davlat universiteti	Shartnoma shartlariga ko'ra moliyalashtirish ishlarini amalga oshiradi	Shartnoma muddatlarida